



SIARAN MEDIA

PROJEK GREAT BERJAYA TARIK MINAT DAN BERI KEMUDAHAN PELABUR DI LEBIH 100 BUAH NEGARA

KUALA LUMPUR, 9 MEI: Unit Pemodenan Tadbiran dan Perancangan Pengurusan Malaysia (MAMPU) dan Lembaga Pembangunan Pelaburan Malaysia (MIDA) hari ini menandatangani persetujuan penyerahan Sistem Projek *Government Electronic Advancement Transformation* (GREAT) daripada MAMPU kepada MIDA.

Majlis menandatangani penyerahan ini disempurnakan oleh YBhg. Dato' Dr. Mazlan Yusoff, Ketua Pengarah MAMPU dan YBhg. Dato' Azman Mahmud, Ketua Pegawai Eksekutif MIDA dengan disaksikan oleh YB Datuk Joseph Entulu Anak Belaun, Menteri di Jabatan Perdana Menteri dan YB Dato' Sri Mustapa Mohamed, Menteri Perdagangan Antarabangsa dan Industri.

Menurut YB Datuk Joseph Entulu, "Sistem GREAT ini banyak memberi manfaat kepada pelabur berpotensi yang berminat untuk mendapatkan maklumat terkini berkaitan dengan peluang dan kemudahan pelaburan di Malaysia melalui capaian kepada portal myCORRIDOR yang boleh diakses secara global pada bila-bila masa. Sehingga kini, portal ini telah diakses oleh lebih dari 100 buah negara di serata dunia bagi mendapatkan maklumat mengenai lokasi pelaburan, berita-berita terkini mengenai peluang pelaburan di koridor ekonomi, maklumat insentif kepada pelabur, sumber tenaga kerja dan kemudahan-kemudahan yang terdapat di kawasan pelaburan."

“Peranan MIDA sebagai pemilik sistem selepas ini adalah amat bersesuaian dan bertepatan dengan fungsinya iaitu untuk menggalakkan pelaburan asing dan tempatan, membuat perancangan pembangunan industri dan seterusnya membuat dasar dan strategi dalam bidang pelaburan,” tambah YB Datuk Joseph Entulu lagi.

YB Dato’ Sri Mustapa berkata, “Penyerahan sistem ini sangat bertepatan dengan mandat yang telah diberikan oleh Mesyuarat Jemaah Menteri pada Disember 2014, kepada MIDA sebagai “*single window*” untuk menyelaras semua pelaburan di Malaysia. Dengan mandat ini, MIDA berperanan sebagai agensi penyelarasan utama pelaburan serta pusat pengumpulan dan rujukan pertama bagi maklumat berhubung pelaburan dalam semua sektor ekonomi. Ini merupakan titik permulaan untuk membentuk satu platform yang lebih berkesan dalam melaksanakan usaha promosi pelaburan yang lebih menyeluruh dan bersepadu oleh MIDA dan semua agensi berkaitan. Saya berharap pelaksanaan sistem ini akan secara langsung merancakkan lagi perkembangan ekonomi Malaysia demi kesejahteraan rakyat.”

“Pastinya, perlaksanaan sistem ini tidak boleh dibuat secara *silo*. Kejayaan perlaksanaannya banyak bergantung kepada kerjasama dan tindakan proaktif Pihak Berkuasa Koridor (PBK) dalam mengemaskini maklumat-maklumat yang diperlukan di dalam sistem tersebut. Oleh yang demikian, saya ingin menyeru semua Pihak Berkuasa Koridor (PBK) berkaitan agar terus memberi sokongan penuh kepada MIDA dalam mengendalikan sistem ini. Saya juga pasti MIDA akan memperhebatkan lagi *engagement* dengan semua pihak yang berkepentingan dalam inisiatif menambah baik lagi sistem GREAT ini,” tambah beliau.

Disediakan oleh:

Bahagian Perancangan dan Komunikasi Korporat

Unit Pemodenan Tadbiran dan Perancangan

Pengurusan Malaysia (MAMPU)

Jabatan Perdana Menteri

03 8872 3138